



Inatsisartunut ilaasortaq Niels Thomsen
Inatsisartut
/Maani

Ingerlatseqatigiiffinni Namminersorlutik Oqartussanit tamakkiisumik ilaannakortumilluunniit pigineqartuni siulersuisunut toqqaanissamut tunngavigineqartussat pillugit § 37 naapertorlugu apeqqut nr. 5-2011-mut akissut

19. jan 2011
Sagsnr. 2011-044399
Dok. Nr. 540784

Inatsisartut suleriaasianni § 37, imm. 1 malillugu apeqqutigisat 6. januar 2011 tiguneqartoq matumuuna akissuteqarfigissavara:

Postboks 1015
3900 Nuuk
Tlf. (+299) 34 50 00
Fax (+299) 32 50 02
E-mail: govsec@nanoq.gl
www.nanoq.gl

Makkuninnga apeqquteqarputit:

1. Naalakkersuisut pilersaaruteqarnerpat suliaqassallutik piginnaanerisariaqakkat allattorsimaffiinik (kompetencekatalog), tamatumani aktieselskabit namminersorlutik oqartussanit pigineqartuni tamani nassuiaatigineqarluni, piginnaasat suut pisariaqarnerisut aktieselskabini aaliangersimasuni siulersuisuni ilaasortaassa-gaanni?
2. Naalakkersuisut pilersaaruteqarnerpat siulersuisuni toqqaasarnissani aaliangiinermi tunngavissanik peqalersitsissallutik, ersarittussaalluni, aaliangiinermi tunngaviit aallaaveqartinneqassanatik kikkut tamarmik pigilersinnaanngisaannik? Tamatumani eqqarsaatigineqarsinnaasut ilagaat suaassuseq, ukioqqortussuseq immikkullu inuiaassuseq.

1-imut

Naalakkersuisut isumaqarput ingerlatseqatigiiffinni namminersorlutik oqartussanit tamakkiisumik ilaannakortumilluunniit pigineqartuni siulersuisut piginnaasaasa katitigaanerat ingerlatseqatigiiffinni pigineqartuni siulersuisut ataasiakkaat aqutsinikkut suliassaan-nik sunniuteqartumik siumullu isigisumik isumagineqarnissaannut qulakkeerinninnissaat pingaaruteqartoq. Naalakkersuisut uani isumaqataapput piginnaasat assigiinngitsut akule-riissinneqarnissaat siulersuisuni suugaluartuniluunniit pingaaruteqartoq. Taamaammat pingaaruteqarpoq inuttut nukiit piginnaasallu inuiaqatigiinnut iluaqutaasumik ator-neqar-nissaat.

Taamaammat Naalakkersuisut tulluartaasut isumaqarfigaattaaq siulersuisunut massak-kut ilaasortaasut ilaasortanngorumaartullu aqqisa allattorsimaffiinut toqqorsivimmik pe-qartoqartariaqarnera, taakku piginnaasaannik, ilinniarsimasaannik sumilu ilaasortaane-rannik alakkareriffiusinnaasumik. Taamaalillutik Naalakkersuisut siulersuisuni atuuffis-sanut piukkunnarnerpaat ingerlaavartumik nassaarissallugit periarfissaqarnerussapput.

Kisiannili Naalakkersuisut ingerlatseqatigiiffinni Namminersorlutik Oqartussanit tamakkiisumik ilaannakortumilluunniit pigineqartuni ataasiakkaani siulersuisunut piginnaaneri-sariaqakkat allattorsimaffiinik aalajangersimasumik sanassallutik pilersaaruteqanngillat. Tamatumunnga pissutaavoq Naalakkersuisut nalilermassuk siulersuisut piginaasaqar-nikkut pisariaqartitsineranni ilaatigut ingerlatseqatigiiffiup massakkorpiaq qanoq inissisi-

manera apequtaasarmat. Assersuutigalugu piffissat ilaanni siulersuisut aningaasartuuteqarnissamut sipaarniuteqarnissamullu nakkutiginnittussat pisariaqartinneqartarput, akerlianillu piffissami allami ingerlatseqatigiiffik taanna siulersuisunik ineriartortitsinissamik nakkutiginnittunik pisariaqartitsisussaalluni.

Siulersuisut piginnaasaqarnikkut eqqortumik katitigaanissaat qulakkeerniarlugu Naalakkersuisut aalajangersimapput ingerlatseqatigiiffiit ukiumut ataasiarlutik siulersuisunik nalilersuisassasut. Siulersuisunik nalilersuineri ingerlatseqatigiiffiup massakkut atukamini pisariaqartitaanik siulersuisut piginnaasaqarnersut qaammarsarneqassaaq. Siulersuisunik nalilersuineq ileqquusumik ataatsimeersuarnissaq pitinnagu Naalakkersuisut peqatigalugit oqallisigineqassaaq siulersuisut katitigaaneritut aaqqiissuteqarnissaq siunertaralugu.

2-mut


Arnat angutillu naligiissitaanissaat pillugu Inatsisartut inatsisaanni nr. 7, 11. april 2003-meersumi siunertarineqarpoq arnat angutillu akornanni, tassa angerlarsimaffimmi inooqatigiinnermi aammalu inuiaqatigiinni suliani tamani naligiissitaanerup siuarsarneqarnissaa, aamma arnat angutillu assigiimmik naleqarnerat aallaavigalugu naligiimmik sunniuteqarnissaat periarfissaallu ilanngullugit. Inatsimmi siunertarineqartoq aammattaaq tassaavoq suaassuseq pissutigalugu toqqaannartumik toqqaannanngitsumilluunniit assigiinngisitsisoqarnissaanik akiuinissaq.

Inatsimmi § 6-imi aalajangersarneqarpoq siulersuisut, sinniisoqarfiit imaluunniit ataatsimoortumik siulersuiffiit taamatut ittut, Naalakkersuisut ilaasortaaitassanik toqqaavigisartagaat angutinik arnanillu tamarmik sapinngisamik amerlaqatigiinnik ilasortaqaartassasut. Tamanna Naalakkersuisut eqqortinniarlugu sulissuteqarput isumaqarlutillu pitsanngoriartitsinissaq inissaqartariaqartoq.

Naalakkersuisut suaassuseq immi piginnaanertut isiginngilaat kisiannili soorunami isumaqarlutik piginnaasat angutit arnallu pigereeraat, taamaammallu angutit arnallu atorneqartariaqarlutik. Naalakkersuisut nalinginnaasumik isumaqarput siulersuisuni assigiinngissuteqarneq atussallugu piukkunnarnerusoq, tassami assigiinngissuteqarneq pitsaanerpaamik aalajangiinissamut aallaaviusarmat. Taamaammat siulersuisuni inuusutunik utoqqarnillu ilaasortaqaarnissaq aamma iluaqutaasinnaavoq, soorluttaaq inuit assigiinngitsunik ilinniagaqartut misilittagallillu ilaasortarinissaat iluaqutaasinnaalluni.

Inussiarnersumik inuulluaqqusillunga

Med venlig hilsen



Kuupik Kleist



5. januar 2010

Inatsisartut Suleriaasianni § 37 naapertorlugu Naalackersuisunut apeqqut imaattoq matumuuna saqqummiuppara:

Naalackersuisunut apeqqut:

- 1. Naalackersuisut pilersaaruteqarnerpat suliaqassallutik piginnaanerisariaqakkat al-lattorsimaffiunik (kompetencekatalog), tamatumani aktieselskabit namminersor-lutik oqartussanit pigineqartuni tamani nassuiaatigineqarluni, piginnaasat suut pigisariaqarnersut aktieselskabini aaliangersimasuni siulersuisuni ilaasortaassa-gaanni?**
- 2. Naalackersuisut pilersaaruteqarnerpat siulersuisuni toqqaasarnissani aaliangi-nermi tunngavissanik peqalersitsissallutik, ersarittuussalluni, aaliangiinnermi tun-ngaviit aallaaveqartinneqassanatik kikkut tamarmik pigilersinnaanngisaannik? Tamatumani eqqarsaatigineqarsinnaasut ilagaat suaassuseq, ukioqqortussuseq immikkullu inuiaassuseq.**

(Inatsisartuni ilaasortaq Niels Thomsen, Demokraatit)

Tunngavilersuut:

Aktieselskabini pisortat pigisaanni siulersuisuni issianeq tassaavoq tassaassallunilu suliaq pimoorussa. Taamaammat tamanut pingaaruteqarpoq, pisortanut siulersuisunilu ilaasortassatut toqqagaasimasumut, siulersuisuni issianissamut piumasaqaatinik naammassinnissinnaanissamut eqqortunik piginnaasaqarnissaq.

Aktieselskabit tamarmik assigiinngimmata tamatuma piumasarivaa, siulersuisuni assigiinngitsuni assigiinngitsunik piginnaasaqarnissaq. Piginnaanerit pigisariaqakkat taakkua inunnik siulersuisu-ni inissisimasussanik toqqaannginnermi ersarittumik nassuiaatigineqarlutik allaaserineqarsi-masariaqarput. Taassumap saniatigut pingaaruteqarpoq, tallimanik arfineq marlunnilluunniit as-sigiinnik siulersuisunut toqqaannginnissaq. Aktieselskabip piginnaaneqarnikkut pisariaqartitai malillugit siulersuisup tamarmiusup naammassisinnaasariaqarpai.



Assersuutigerusuppara napparsimavik. Tassani sulisut immikkut piginnaaneqartitertut pigineqartarput. Taamaasiornikkut iligiit mikinerpaat piginnaaneqarnerpaalli suliamut kivitsisussatut pigineqalersarput.

Assersuut alla tassaavoq arsaattartut holdii. Siukkanik pitsaanerpaasunik isikkanilinnik arsar-toqarlutit sassaruit ajugaanissaq ilimanangilaq. Målmandip, kinguarsimasut, qeqqani arstartut siukkallu akuleriisitaarnerat eqqortuusariaqarpoq.

Taamatuttaaq Naalakkersuisut qulakkeertariaqarpaat, tamatigut siulersuisuni akisussaafigisani iligiit pitsaanerpaat sassartittarnissaat. Demokraatit assersuutitut isumaqarput pingaaruteqartoq, akieselskabini namminersorlutik oqartussat pigisaanni sorliugaluartuniluunniit ukunani akulerisi-taartunik piginnaasaqarnissaq: Nioqqutissanik tunisineq, pilerisaarineq, aningaasaliineq, nioq-quteqarfinnik misilittagaqarneq, assigisaanik siulersuisuni misilittagaqarneq tuniniaavinnillu ilisimasaqarneq.

Ilisimavara matumani Naalakkersuisunut apeqquteqarninni eqqartukkama ilaat Bestyrelsessekretariatimi suliarineqartartut, pingaaruteqarsorivarali, aktieselskabini namminersorlutik oqartussat pigisaanni pimoorussamik peqataanissami piginnaasanik piginnittoqartariaqarnera ammanerumik sammineqarnissaa.

Apeqqutit akeqquneqarput ullut suliffiit naliginnaasut qulit iluanni.